

371* gnor Dio, e 'l bon governar fato, si ha recuperato il Stado, e longamente si persevererà augumentando quello. Ma poi questa fortuna, à sussità una peste, un morbo dannoso a questa excelentissima Repubblica, ch'è l'ambizion, et *maxime* nel vostro Consejo di Pregadi, si pregando a le scale di Pregadi (*come*) in la Quarantia, in chiesa di San Marco, a Rialto, per li officii, frati, monache e altri; sichè tutto è pregierie. Però, quel dignissimo senator missier Marco Foscarei, savio a terra ferma, visto questa propinqua ruina, e che non si atendea si non a pregierie, fece notar la presente parte, posta al conspetto di le signorie vostre, da le qual sarà aprobata come fo eri nel Senato; e intrò in opinion il clarissimo missier Francesco Foscarei procurator, savio dil Consejo, *licet* questo mio honorandissimo fratello metesse un scontro di star su le parte prese e li Avogadori le exequissa, e si desse la balota contra quelli pregaseno. Questa parte, signori excellentissimi, non è altro che per le eletion e scurtinii si fanno in Pregadi, e scurtinii di Pregadi in Gran Consejo, qual è confirmazion di le leze prese. La qual ambizion comenzò dil 1448, e fo, per lo Excellentissimo Consejo di X, provisto che non si pregasse, e fusse i delinquenti banditi per do anni dil Mazor Consejo, pagasse lire 200 et fosseno publicadi. Poi, di tempo in tempo, cressendo le pregierie, fu posto varie leze; et perchè l'è stà dito questi voleno andar per via de inquisition, questa è parte vechia che si solea in Pregadi chiamar 20 zentilhomeni de quelli di Pregadi et Zonta, da poi li scurtinii fati, e per li Avogadori e Cai di X erano sacramentadi si erano stà pregadi, e non trovando, diceva il Canzelier *omnia bene*, et erano poi publicadi i rimasi. Poi non parse più servar tal ordine; fu posto dar la balota contra a quelli arà pregato o fato pregar. *Demum*, fu posto che li electi fosseno chiamati a la Signoria e datoli sacramento su' messali non haver pregato o fato pregar, poi erano balotadi. Et venuta la guera, tutte dite parte è suspese; sichè tutti priega. Adesso si vol, con nova forma di executori, proveder a le pregierie si fa a quelli di Pregadi, e diremo, questa è cosa nova. *Antiquitus*, li nostri santi progenitori che elezevano li Savii di Colegio, e perchè molti non voleano tal cargo, fu posto parte di darli pena a li refudanti e apontar, per li Cai di Quarantia, quelli non venisseno a palazzo. Ogni di adesso vien fato pratiche grandissime per intrar in Colegio, e con tal pratiche riman di quelli, che se questi non fusse, non sariano rimasti. Si fevano li oratori si per congratulazion: refudando, fevano di altri con pena. Se per cose di Stado, man-

davano li primi senatori, et a questo proposito, dil 1465, apar in Libro quinto per terra, essendo stà electo orator al Summo Pontefice il clarissimo missier Bernardo Justinian, il qual essendoli stà robà le veste refudò di andar, quelli padri erano al governo messeno parte elezer in suo loco, con questo li fusse donado ducati 1000, e fo reelecto dito missier Bernardo, e acetò e andò. Adesso, per andar ambadori, non si fa altro che pratiche, e si convien voler tal, e li judicii non si pol far sinceri a ben di questo Stado, e questo istesso è di provedadori etc. Questa parte, signori, provide a remover le pregierie. Si dice è spexa a far novo officio: è *solum* ducati 250 a l'anno; e per sì piccola cossa, questo Stado starà di voler proveder a questa cossa di tanta importanzia contra il ben, utele e mantenimento dil Stado nostro? L'è stà dito, avè li Avogadori di Comun; quelli dieno observar le leze. Signori excellentissimi! intesi da un savio questa degna autorità: *Si in his fides esset in quibus esse deberet, non laboreremus*. Li clarissimi Avogadori hanno altri impazi, si a li criminali, come a le altre leze dil Gran Consejo; che questa parte non si extende a questo Consejo ma al Pregadi, perchè, vui signori, sete *domini rerum*; e ho visto, quando per li banchi vien pregade le Excellentie Vostre, tanto mancho si roman: si questa parte provide a la execution, perchè *ambitio omnium malorum mater est*. Vien imputà missier Marco Foscarei, ha pregato per esser savio di terra ferma, e rimaso à posto questa parte. Signori, el merita gran laude, et è stà fato per la soa sufficiente, perchè quando l'era tolto si ritrovava fuora, e ave 120, e venuto, rimase. Concludendo, signori excellentissimi, è parte degna, utile, proficua, necessaria al ben et pacifico viver de le vostre Excelentie, 372* a le qual mi ricomando, acertandole, *ex debito conscientiae*, per ritrovarmi per gratia di le signorie vostre in dito Senato, e vedo le pregierie vien fate, ho voluto dir queste poche di parole etc.; con altre parole ben a proposito, qual al presente non mi socore dover scriverle. Et mi andò a risponder un certo sier Piero Orio, XL criminal, di sier Bernardin el cavalier; non fo molto aldito, *licet* habi bonavose. Disse io biasimo le pregierie, et ho pregato per esser savio da terra ferma. El Consejo se la rise, dicendo l'ha fato quel fa li altri, et biasemò la parte. Poi venuto zoso, andò suso sier Francesco Morexini qu. sier Piero, zovene, et parlò ben; ha pocha vose, non aldito, merita laude; mi laudò assai. Hor andò la parte posta per i Consieri, et sier Bernardo Donado, Cao di XL, voleva meter scontro quello